

OHR poziva vlasti da preuzmu vodeću ulogu u reformi policije

OHR pozdravlja značajan sastanak koji će o pitanju restrukturiranja policije predstavnici institucija vlasti sutra održati na Mrakovici. Očekujemo da će sastanku prisustvovati zvaničnici na visokim funkcijama koji imaju ovlaštenje da pregovaraju i koji će dati konstruktivan doprinos daljem nastavku procesa pregovora o reformi policije.

Restrukturiranje policije u skladu s principima EU je posljednji značajni uvjet koji Bosna i Hercegovina mora ispuniti ukoliko želi započeti ključne pregovore o potpisivanju Sporazuma o stabilizaciji i pridruživanju sa EU. Reforma policije je takođe od suštinskog značaja ukoliko se Bosna i Hercegovina želi efikasno suprostaviti organiziranom kriminalu, osigurati blaži vizni režim te prekinuti veze između politike i policijskih struktura.

Bosna i Hercegovina mora do kraja septembra postići dogovor o restrukturiranju policije ukoliko želi da prije desete godišnjice Dejtonskog sporazuma u novembru 2005. godine ispuni sve uvjete za ove ključne pregovore i dobije šansu da sustigne svoje najbliže susjede – Hrvatsku i Srbiju i Crnu Goru. O uvjetima za članstvo u EU se ne može pregovarati, a put Bosne i Hercegovine ka Evropi će biti blokiran sve dok bh. političari ne budu spremni da provedu reforme koje su u skladu s ovim uvjetima.

Pred bh. zvaničnicima je stoga jasan izbor: ili će pokazati liderske kvalitete i suočiti se s teškim odlukama koje je potrebno donijeti kako bi ova zemlja ostvarila napredak, ili te odluke neće donijeti zbog čega će se morati suočiti s posljedicama koje će snositi oni lično, ali i BiH u cjelini. Za Bosnu i Hercegovinu je važno da njeni lideri pokažu ozbiljnost u vezi s ovim pitanjem te da se odgovorno ponašaju, stavljajući na prvo mjesto Bosnu i Hercegovinu a ne političko manevrisanje.

Ispitivanja javnog mnijenja u Republici Srpskoj i Federaciji BiH pokazuju da građani ove zemlje ozbiljno shvataju ovu reformu i jasno znaju šta žele. Ništa manje ne očekujemo ni od bh. lidera. Četiri od pet građana žele priključenje EU. Građani žele da politika ne utječe na rad policije. Građani žele da njihovi političari povedu ovu zemlju ka modernoj Evropi, a ne da je vežu za njenu prošlost.

Sutrašnji sastanak će biti test koji će pokazati da li institucije ove zemlje dorasle ovom izazovu.

OHR neće prisustvovati ovim pregovorima, ali je spreman pružiti tehničku pomoć po pozivu.